

Chiiruajtkat Karaloukta nütüma

PEDRO

Ashajüshi Pedro namüin na anoujashiikana

1 ¹Taya, wane nüchepchiakai Jesucristo, wane chi Aluwataaushikai nütüma, Pedrokai anülia, ashajüshi joo taya jümüin jia anoujashiikana nünain wanaa wamaa. Cristo, nia Wamaleiwasekai, nia O'tte'eriika'aya waya. Anata'aleeshiija'a ma'i waya süka lotüin ma'i nukuaippa sünain nu'tte'erüin waya sünainjee tü naa'inrakat.

²Achuntüshi taya jaa'u nümüin chi Wamaleiwasekai süpüla nii'iyatüinjatüin na'anasia waneepia jümüin je süpüla naapüinjachin wane miyo'u ana jümüin sünainjee wanaawajiraain jaa'in nümaa oo'ulaka nümaa chi Wasenyotsekai Jesucristo.

Alaüle'erüinjana naa'in sünain tü nanoulakat

³Chi Maleiwa Pülashikai ma'i, saa'u neenaküin waya süpüla we'rüinjatüin nukuaippa sünain anashaatain ma'i nia, naapüitpa tü che'ojaakat wamüin süpüla shii'iranajaainjatüin waa'in. Je joolu'u, saa'u koo'omüin wamüin tü aleewaakat nümaa, nükaaliijain

waya waneepia süpüla keisalain waya sümüin wakuaiippa nu'upala. ⁴Süka pülashaatain ma'i Maleiwa, alana'aleesia ma'i sünain anain tü nümapü'ükat wamüin sünain pansaain nünüiki süpüla nujuittirüinjanain waya suulia tü yarüttakat atüma waa'in, tü kaainjaleekat atüma tü wayuukolüirua kepiakat a'aka waya, süpüla müinjanain aka waya naa'in Maleiwa sünain anain.

⁵Otta jiakana joolu'u saa'u naa'inrüitpain kasa anasü chi Maleiwakai jümüin, shiainjatü jükuaippa:

Anakaja müleka kachiiruale jaa'in aa'inraa tü nüchekakat jüpüleerua süpüla koo'omüinjatüin sütsüin tü jünoulakat.

Anakaja müleka yalayalale jaa'in süpüla aa'inraa waneepia tü anasükat sümüin wayuu.

Anakaja jiyaawatüle saa'u tü jaa'inrakat müleka anale, müleka mojule.

⁶Anakaja müleka jülaüle'erüle jaa'in süpüla jaa'inrüin waneepia tü anasükat.

Je wanaa sümaa ji'rüin müliaa, anashii müleka jüchecherüle jaa'in sünain anoujaa.

Anakaja juushikajaale süchiirua
tü nüchekakat Maleiwa
jüpüleerua.

⁷ Anakaja ayatüle jia sünnain
kamaneein namüün na
juwalayuu anoujashiikana.

Ai jüpüla wayuu süpüshua.

⁸ Müleka kachiiruale jaa'in tüürua
sünnain jülaüle'erüün jaa'in sünnain
anoujaa, nnojoleerü amalajaain tü
jaa'inrakat nümüün chi Wasenyotsekai
Jesucristo, alu'ujasa akaaliijümeerü
waneepia wayuu jütüma sükajee
ji'raajüün ma'i nia. ⁹ Akaajasa'a chi
wayuu eekai nnojolüün kachiiruain
naa'in shiirua, eekai malaüle'erüün
naa'in sünnain anoujaa, müshia aka
naa'in wane mo'usai, süka nnojolüün
niyaawatüün saa'u tü kasa anasü
naa'inrakat Maleiwa nümüün. Je
nnojotsü sotüün naa'in sünnain
süla'ajaanüün naainjala nuulia nütüma
Maleiwa süpüla wuleinjatüün naa'in.

¹⁰ Tawalayuwaa, shia anaka alu'u
müleka kachiiruale jaa'in aa'inraa tü
nüchekakat chi Maleiwakai jüpüleerua.
Müleka laülaale jaa'in sünnain
anoujaa, nnojoleerü amalajaain tü
jünoulakat. Je sünnainjee tü kasa anasü
jaa'inrakat, jütüjaa aa'ulu sünnain
shiimüün aneekuushin jia nütüma
Maleiwa süpüla nüpüshinjanain jia.
¹¹ Müleka masütaajule sünnain aa'inraa
tü nüchekakat Maleiwa jüpüleerua,
talatashaateerü ma'i jaa'in wanaa
sümaa jikerolüün so'uweena wane ka'i
nüma'anamüün chi O'tte'erüikai waya,
chi Wasenyotsekai Jesucristo, cha'aya
eere nuluwataain süpüla ka'ikat
süpüshua.

**Pansaasü tü nashajakat na
nünüikimaajanakana Maleiwa**

¹² Je sükajee tia, taso'ireerü jaa'in
waneepia sünnain tü anasükat süpüla

jaa'inrüün, mayaasüje jütüjaain saa'u
otta jüchekerüün jaa'in sünnain
anoujaa tü shiimüün ekirajünakat
anain jia. ¹³⁻¹⁴ Saa'u taapinnüün
nütüma chi Wasenyotsekai
Jesucristo saa'u sülü'ülüün takalia
süpüla ouktajachin taya, anasü
saa'in tamüün müleka taso'irüle
jaa'in süma'inru'u katüün to'u sünnain
tü kasa anasü jaa'inrüünjatkat.
¹⁵ A'yataashi ma'i taya sünnain
takaaliijain jia süka süpüshua taa'in,
süpüla sotüünjatüün jaa'in waneepia
tachipünaa ouktapa taya tü shiimüün
tekirajapü'ukat anain.

¹⁶ Jütüjaa aa'ulu sünnain nnojolüün
wale'eru'ujeejatüün tü pütchi
wekirajapü'ukat aka jia nüchiki chi
Wasenyotsekai Jesucristo sünnain
nüle'ejuünjachin so'uweena wane
ka'i süka pülashin nia. Shiimüün tü
wamapü'ukat jümüün, süka we'rüün
paala nia sünnain anashaatain ma'i
niyolojo so'u tü ka'i shii'iranajaakat
o'u nu'upünaa oo'ulaka nüshe'in.

¹⁷ Watüjaa aa'uchi sünnain kojütüün
nia nütüma Maleiwa wanaa sümaa
tia, süka waapüün wane pütchi
chejee eejee Maleiwa Pülashikai ma'i
sünnain müün: "Anii chi Tachonkai
aishikai tapüla. Talatüsü ma'i taa'in
nümaa", müsü. ¹⁸ Shiimain sünnain
waapüün tia pütchi iipünaajeejatkat,
süka eejanain waya nümaa Jesús
so'u ka'ikat tia naa'u chi uuchikai
eejachire nu'waajünüün nütüma chi
Nüshikai.

¹⁹ Je süttüma tü nünüiki
Maleiwa waapakat so'u ka'ikat tia,
watüjaaaitpa aa'u joolu'u sünnain
pansaain ma'i tü naküjapü'ukat
achiki paala na nünüikimaajanakana
Maleiwa. Müsü aka wane anakia
süpüna wayuu sa'wai, süka
wo'ttüünapain sünnain wayaawatüün

saa'u tü shiimüinkat sütüma. Je sükjajee tia, anakaja müleka eere jaa'in sünnain tü nashajakat. Otta so'uweena tü ka'i niil'iyataajeetkat o'u Jesucristo, wayaawateerü aa'u süpüshua'aya tü shiimüinkat.²⁰⁻²¹ Soto jaa'in sünnain nnojoliün nale'eru'ujeejatüin ne'e na nünüikimaajanakana Maleiwa tü namapü'ükat, je nnojotsü nachekalain ne'e namüiwa tü ashajaakat. Watüjaa aa'ulu sünnain shiain tü nünüikikat Maleiwa, süka nashajüin tü nüchekalakat chi Naa'inkai Maleiwa süpüleerua nashajüin.

Aja'ttinneena na ekirajüliikana sünnain alawaa

2¹ Otta sa'aka tü wayuukolüirua paalainka, eejana wane nünüikimaajanayaakana Maleiwa, na aküjapü'ükana alawaa. Eejeerü mapeena ja'aka jiakana wane ekirajülii eekai müin aka naya sünnain aküjaa alawaa. Keme'erieerü ma'i nanüiki je nnojoleerü shiyaawatüin aa'u wayuu sünnain shiain alawaain tü nekirajakat anain. Amalajaajeerü sünnoula tü wayuu kapülakat aa'in nanüiki, süka nnojoleerüin lotüin tü nekirajeetkat anain noo'opünaa Cristo. Antaleejeena sünnain ayüülajaa chi Senyotkai awalaajakai naainjala oo'ulaka nayoukteechi süpüla laülaainjachin nia naa'u. Kasalajana meeria namüin naainjala mapeena süpüla naja'ttinneenain nütüma.² Wainmeerü tü wayuu oushikajaakat süchiirua tü kasa mojusü nekirajeetkat anain sümaa süshatüin sukuaiippa tü kasa mojusü naa'inrakat. Je mojeerü sünnüiki wayuu sümüin tü pütchi

shiimüin nikirajapü'ükat anain Jesús sükjajee tia.³ Nala ekirajüliikana sünnain alawaa, saa'u kachiiurain naa'in washirüü, naküjeerü jümüin pütchi nale'eru'ujeejatü ne'e süpüla ne'ike'erüinjanain jia süka na'alain saa'u jükorolo. Otta saa'u shiimüin sünnain kasalajaneerüin namüin naainjala nütüma Maleiwa, aja'ttinneena naya nütüma maalü.

⁴ Soto jaa'in chi Maleiwakai sünnain nnojoliin naawalüin na aapiee kaainjalashiikana. Nüjünajaain naya eemüin süpüle tü ouktüsükalüirua kanülüakat Hades, süpüla püreesainjanain naya sa'aka piyuushi wane'ere'eya süntapa tü nakalia kasalajaneetkat o'u naainjala.⁵ Maa'aya aka nukuaippa Maleiwa sümaiwa paala sünnain nnojoliin naawalüin na wayuu mojutkana atüma nia. Nü'itirüin wane juya naa'u miyo'ushaata ma'i süpüla ouktajanain naya sütüma. Achiajaanüshiiyaaaje naya nütüma Noé, chi wayuu aa'inrakai kasa anasü nu'upala Maleiwa, suulia süsalajüin naya tü naainjalakat nütüma Maleiwa. Niakalaka ne'e o'tte'ennüin namaa akaratshishii na kepiakana nümaa suulia wüinsirüin naya.

⁶ Maa'aya aka nukuaippa Maleiwa sümaiwa paala sünnain nnojoliin naawalüin tü wayuukolüirua mojutkat atüma nia kepiasükat sulu'u tü pueulokat Sodoma oo'ulaka Gomorra. Na'ajüin tü pueulokalüirua süka siki süpüla shiyaawatüinjatüin wayuu saa'u tü alatajatkat sümüin süpüshua tü eekai müin aka naya sünnain mojutüin Maleiwa natüma.⁷⁻⁸ Otta müshia Lot, chi wayuu aa'inrakai kasa anasü, ajuittinnüshi nütüma Maleiwa sulu'ujee Sodoma

eejachire kepiain nia sa'aka wayuu kaainjarannuu. Mojosü ma'i naa'in Lot sütüma naainjala na wayuukana süka yarüttüin ma'i shia. Müliasü ma'i naa'in süka kaainjalain naya nu'upala je süka naapiün süchiki süpüshua tü kasa mojosü saa'inrakat waneepia.

⁹Saa'u no'tte'ennüinapain Noé oo'ulaka Lot nütüma Maleiwa, shiimüin sünain nuuntüin Maleiwa niyu'lüin waya sa'akajee oo'ulakünaa aa'in, waya aa'inrakana tü anasükat. Otta na kaainjaraliikana, shiimüin sotüinjatüin naa'in Maleiwa tü naainjalakat wane'ere'eya süntapa tü ka'i kasalajaneetkat o'u tü naainjalakat.

¹⁰Shiimüinre'eya ma'i sünain süsaleenain na ekirajüliikana sünain alawaa so'u ka'ikat tia, süka kale'eru'uin süchiki kaainjalaa je süka naa'inrüin waneepia tü yarüttakat atüma naa'in. E'rülüi wayumüin naya nümüin Maleiwa süka nayouktüin süchiki laülaain nia naa'u. Püla aa'inchii naya waneepia suulia wayuu süpüshua. Je mojosü nanüiki namüin na laülaayuushii chakana iipünaa.

¹¹Otta na aapieekana nüma'ana Maleiwa, eereje pülashin ma'i noulia na laülaayuushiikana chakana iipünaa, nnojotsü mojuin nanüiki namüin nu'upala Maleiwa.

¹²Na ekirajüliikana sünain alawaa, mojuulaashaatashii ma'i naya. Mojosü ma'i nanüiki süchiki kasa eekai nnojolüin natüjaain saa'u. Müshii aka saa'in mürüt sünain aa'inraa tü nachekalakat ne'e namüiwa. Je maa aka süta'ünnüin mürüt süpüla su'utinnüin aa'in süpüla ekünaa, meena naya aja'lajaain.

¹³Na ekirajüliikana sünain alawaa, ne'reerü müliaa saaliijee müliain wayuu natüma paala je saaliijee maa'in naa'in wanaa sümaa naa'inrüin kasa mojosü su'upala wayuu wainma je wanaa sümaa nekaain jümaa. Mee'erapalashii jia sütüma wayuu sükajee tia.

¹⁴Kale'eru'ushii naya süchiki kaainjalaa. Jülüjasü waneepia naa'in ama'üjawaa sümaa wayuu nnojotkat na'wayuusein. Otta na eekai jo'uuin sünain anoujaa, aa'inreeshii kasa mojosü sütüma ne'rüin tia. Na ekirajüliikana sünain alawaa, ne'ike'ereerü wayuu süka na'alain saa'u sükorolo süka kachiiruin naa'in washirüü. Shiimüin sünain süsalainjaneenain naya nütüma Maleiwa sükajee tia. ¹⁵Nayouktüin tü shiimain ekirajünakat anain naya, maa aka naa'in chi nünüikimaajachikai Maleiwa paala sümaiwa kanüliakai Balaam chi nüchonkai Beor, chi aa'inrakai kasa mojosü shii'iree walaain nümüin.

¹⁶Achiajaanüshi nia nütüma wane püliikü. Ja'itaichi manülin chi ne'ejenakai saa'u mürülüin nia, ayatshia aashajaain süka sünüiki wayuu süpüla nuu'ulaainjachin chi nünüikimaajachikai suulia mache'ein nia sünain tü kasa mojosü naa'inrüinjatkat.

¹⁷Na ekirajüliikana sünain alawaa, müshii aka naya saa'in wane ishi eekai me'wiirain eere nnojolüin wüin süpüla wayuu. Müshii aka naya saa'in wane siruma eekai sülatüin ne'e sümaa nnojolüin sü'itüin tü juyakat sütüma. Ajütüneena naya cha'aya shiinalu'umüin tü mmakat sa'akamüin tü piyuushikat nütüma chi Maleiwakai süsala

naainjala. ¹⁸ A'waataashii ma'i na ekirajüliikana sünnain alawaa sulu'u nakuaippa süka pütchi nale'eru'ujeejatü no'upala na wayuu ajuitüinapakana na'akajee na manoujainsaliikana. Shii'iree kachiiruain naa'in süchiki kaainjalaa na anoujashiikana natüma, a'waataashii no'upala, süka pütchi eekai keme'erian, sulu'u tü kasa saa'inrakat wayuu kaainjarannuu. ¹⁹ Na ekirajüliikana sünnain alawaa, ja'itaina naya'inaya ne'e süchepchiain tü kaainjalaakat, ekirajüshii naya wayuu sünnain laülawaa namüüwa süpüla aa'inraa eekai nacheküin. Na'alain ne'e tü namakat. Maa aka wane wayuu eekai naapajiraain nukuaippa süpüla a'yatawaa nümüin nülaamain, akaajaa na ekirajüliikana sünnain alawaa sünnain süchepchiain kaainjalaa süka naapajiraain nakuaippa sünnain aa'inraa waneepia kasa mojusü.

²⁰ Eere wane wayuu, saa'u aleewain nümaa chi Wasenyotsekai Jesucristo chi O'tte'erüikai, müleka nujuittüle sa'akajee tü kaainjarannuukat sünnain süchepchiain kaainjalaa nüchikua, alana'aleejeeria ma'i sünnain mojuin nukuaippa suulia palajana paala. ²¹ Anasüje nümüin müleka nnojoruleje nütüjaain saa'u tü anasükat, tü aluwataanakat anain nütüma Maleiwa, suulia nütüjaain saa'u sümaa niyouktüin shia. ²² Shiimüin tü ashajünakat achiki sulu'u tü karaloukta nüchikimaajatkat Maleiwa sünnain müin mayaa:

“Wane erü eekai sheetüin,
shiküin sheenüin süchikua.
Akaajaa wane püülükü müleka
so'oojinnüle paala,

ale'ejasü süchikua sünnain
shiyarülajaain süta sa'aka
pootshi”.

**Katsüinjatü waneepia naa'in
na anoujashiikana süma'inru'u
na'atapajüin niitaainjachin Cristo**

3 ¹ Tatünajutumuyuwaa, jia aishiikana tapüla, piantuaichi joo taya ashajüin karaloukta jümüin. Anasü saa'in tamüin toso'irüle jaa'in süpüla jülüjünjatüin jaa'in waneepia kasa anasü. ² Acheküsü süpüla sotünjatüin jaa'in tü namakat na nünüikimaajanakana Maleiwa paala sümaiwa. Je tacheküin süpüleerua jiyaawatüin saa'u süpüshua tü nuluwataakat anain chi Wasenyotsekai Jesucristo, chi O'tte'erüikai, tü aktijünakat jümüin natüma na Aluwataaushikana ajüttünakana jünainmüin.

³ Anakaja jiyaawatüle saa'u wane kasa. So'uweena wane ka'i pejepa süpüla niitaainjachin Cristo, wainmeerü wayuu eekai kale'eru'uin süchiki kaainjalaa. Neme'erainpaleena jia saaliijee tü jünoulakat sünnain maa jümüin: ⁴ “¿Pansaayaasükalaje'e tü namakat na nünüikimaajanakana Maleiwa sünnain niitaainjachin Cristo? ¿Jalaka'a nia? Nnojotsü kasain ee'iranajaayaain süchikijee ouktüin na watuushinuukana. Müsü wanaawakai saa'in wamüin kasa süpüshua maa aka paala sümaiwa sükumajaiwa'aya tü mmakat”, meena naya.

⁵ Tamüshii paala jia: Natüjaa aa'ulu sünnain nnojolüin shiimüin tü namakat jümüin. Nnojotsü nanoujeein nüchiki chi Maleiwakai sünnain nükumajüin tü kasa chakat iipünaa. Otta nnojotsü

nanoujeein sünain nükumajüin tü mmakat shirokujee tü palaakat süpüla eenjatuin shia pasanain sünain. Shiimüin nükumalain Maleiwa tü kasakalüirua, je naa'inrüin shia süka nünüiki. ⁶Je shiimüin nü'itirüin paala wane juya miyo'ushaata ma'i saa'u tü wayuu kaainjaratkalüirua süpüla ouktajanain naya sütüma je süpüla saja'ttüinjatuin kasa süpüshua so'u ka'ikat tia. ⁷Maa aka shiain nünüiki tü nükumajakat aka kasa süpüshua, shieerü kasalajanainjatka aka mapeena saainjala wayuu sümüin. Otta a'atapajüshi maa'ulu yaa chi Maleiwakai süpüla naja'ttirüinjatuin süka siki so'u ka'ikat tia tü mmakat oo'ulaka na wayuukana mojtukana atüma nia oo'ulaka tü kasakalüirua süpüshua chakat iipünaa.

⁸Tawalayuwaa, jia aishiikana tapüla, te'itaainjatü joolu'u jüpüleerua wane pütchi jülüjüinjatkat jaa'in. Je 1.000 juya, müsia aka saa'in wane ka'i ne'e nümüin chi Maleiwakai. Je wane ka'i, müsia aka saa'in 1.000 juya nümüin. ⁹Eesüja'a süpüla sümüin wane wayuu: "Aawalaashi chi Maleiwakai suulia nikettaajüin tü nümakat sünain pansaain nünüiki". Tamüshii paala jia: Nnojoiishi aawalaain nia suulia. Nnojoyü'liya eitaain Cristo süpüla süsalainjatüin saainjala wayuu, süka nücheküin Maleiwa süpüleerua shiyaawajaainjatüin wayuu süpüshua suulia saainjala. A'atapajüshi nia süka nnojolüin nücheküin süpüleerua eenjatuin wayuu eekai amüloulin saaliijee manoujain.

¹⁰Otta shiimüin niitaainjachin Cristo mapeena. Je tü ka'i

niweeteetkat o'u, meeria aka saa'in nüntia wane ka'ruwarai sünain matüjaajuuin naa'u. Je so'uweena ka'ikat tia, aja'ttinneerü tü kasakalüirua süpüshua chakat iipünaa sümaa miyo'ushaatain sütürüla. Maa'aya aka tü jolotsükolüirua süpüshua chakat iipünaa, a'ajüneerü. Maa'aya aka tü mmakat sümaa tü kasa eekalüirua yaa soo'opünaa, a'ajüneerü shia'aya.

¹¹⁻¹²Otta müsia joolu'u, saa'u saja'ttinneerüin kasakat süpüshua, maa aka tü taküjaitpakat achiki jümüin, çjamüinjatü jukuaippa süma'inru'u ja'atapajüin nükalia Cristo? Ee jümata jaa'in süpüla ka'ikat tia sümaa jükatalaain suulia kaainjalaa. Je anakaja jaa'inrüle waneepia tü kasa anasü nüchekakat Maleiwa jüpüleerua. Eesü süpüla süntajatuin maalü tü nükaliakat. Anakaja müleka yapaleje jia süpüla. Shiimain sünain sa'ajünüinjatuin tü kasakalüirua chakat iipünaa oo'ulaka tü jolotsükolüirua sünain saja'lajaainjatuin so'u ka'ikat tia. ¹³Otta ja'itairü aja'lajaajeerüin tü kasakalüirua süpüshua, akumajüneerü wane jeket shii'iraka, wane mma oo'ulaka wane kasakalüirua chakat iipünaa. Je napüshua na wayuu kepieenakana cha'aya, nayeena na jüüjüüshiikana nümüin Maleiwa. Watüjaa aa'ulu sünain sülateerüin tia, süka shiain tü nüküjakat achiki paala Maleiwa sünain pansaain nünüiki.

¹⁴Tatünajutüirua, jia aishiikana tapüla, saa'u een jaa'in sünain ja'atapajüin tü ka'i nüle'ejüinjatkat o'u Cristo, anakaja müleka kachiiruale jaa'in sünain wuleinjatuin jaa'in sümaa lotüinjatuin jukuaippa no'ulu'u

Maleiwa sümaa wanaawajiraain jaa'in nümaa. ¹⁵Müshi taya tachikua: Nnojoyü'iya eitaain Cristo, shia süka na'atapajüin chi Maleiwakai süpüla su'tte'ennüinjatüin wayuu wainma. Otta chi wawalakai Pablo, chi aishikai wapüla, saa'u kekiin ma'i nütüma Maleiwa, ashajüshi nia'aya nüchiki Maleiwa sünain na'atapajüin. ¹⁶Shia tü nüshajakat achiki sulu'u tü nükaralouktasekat süpüshua. Eesü pütchi eekai kapüleein sulu'u. Je na wayuukana eekai matüjain, eekai nnojölüin lotüin anüiki, mojusü sükújia natüma tü nüshajakat Pablo. Je mojusü sükújia natüma süpüshua tü ashajuushikat sulu'u tü nüchikimaajatkat chi Maleiwakai. Shiimüin sünain naja'ttinneenain maalü süsalajee tia nütüma Maleiwa.

¹⁷Tawalayuwaa, jia aishiikana tapüla, saa'u jüchiajaanüin tatüma noulia na ayouktakana nünüiki Maleiwa, na ekirajüliikana sünain alawaa, jalia jia suulia kapülajüin jaa'in nanüiki. Müleka jüshatüle nakuaippa, amalajaajeerü tü jünoulakat. ¹⁸Shia anaka alu'u müleka kachiiruale jaa'in sünain koo'omüinjatüin sütsüin tü jünoulakat sütüma na'anasia Maleiwa aapünakat jümüin. Anakaja müleka juushikajaale süchiirua koo'omüinjatüin jümüin tü aleewaakat nümaa chi Wasenyotsekaai Jesucristo, chi O'tte'erüikai. Kasataalejese kojutüinjachin nia sütüma wayuu wainma maa'ulu yaa je süpüla ka'ikat süpüshua. Amén.